



Sedego

TESTAMENT DE
LA VECIA 2014

INTRODUZION

Sacranon dove sone rivada?
Gnelo fora da dove tuta sta masnada?
Qua i è veci, doveni e de meda età,
mi no credee de rivar fin qua!

Le pite le ho già guarnade da an toc
no ston parla po dei me oc.
L'era ora de ndar su la branda
Ma son finida da n'altra banda.

So ben che no l'era la sera de ndar in giro
parchè sta not a le vece i ghe fa an brut tiro.
Ere già pronta a svestir le traverse
par meterme sot a le cuerte.

Po pase de là de na tenda,
e me trove in te sta strana fazenda.
Averoe da ciaparmela? Ma gnanca par idea!
Ghe n'ho vist ben de pedo su la vita mea!

Intant ve salude tuti quanti,
no importa se siè santi o briganti.

Vardela qua la rompico...

Marieta, Marieta, setu qua anca ti?

Cosa ditu che se an poc ciacolon?
Se proprio i ol petarne fogo,
tanto vale che stone al dogo...

N'an de politica... da Monti a Renzi

Do a Roma, par scominziar, n'an fa avon molà al profesor Monti...
l'era serio, ma ghe cenea masa ai so conti!
E l'é pasà da parlar co la Merkel de spred coi bunt
a eser taià fora e magnar pan coi but.

**Fatostà che sion 'ndati ale elezion
e pareo che Bersani al solese
che sta olta al PD al vinzese.
Ma no i avea fat i conti con Berlusconi
e le so promesse da bocaloi
"Se te me vota,- al disea -,
te rimborse l'IMU de tasca mea"
ciàmeghe ladro, evasor o molton
ma in strategia a l'é proprio an campion!**

Ma in parlamento, al vero rebalton,
l'e gnest da Grilo e dai so on.
La so gente del sistema la é straca
e no i vede l'ora de far serar su baraca.

“Taiar i costi, via al senato,
oi an mondo digitalizato”
“Via i interessi dal parlamento
potere ai cittadini e al movimento”.

**Gnent da dir, al pol anca aver rason,
ma l' é le so maniere che le da preocupazion.
In fondo i so ideali i é de democrazia,
ma i me par pì da naia, co la so gerarchia.**

Eh si...se qualcheduni al dis calcosa de sbaià,
in cuatro e cuatro oto al se cata radià.
Ghe manca an conceto da imparar:
che anca coi nemighi te a da colobarar.
Insoma tuti i à le so pretese
ma l'é da cenerle da parte par al ben del Paese!

E che pena al me à fat quel su tel Col
l' era belche in spiaggia a Napoli sot al sol.
E invezze gnent da far!...
pal ciopin i lo à blocà.
Pore can! a 90 ani
ancora do a Roma a rapresentar i taliani.

**Ma elo possibile che no ghe fuse altri
an cin pi doveni e pimpanti?!
Napolitano l'é stat an sior
e no se pol dir che no l' ebie fat le robe col cor.
Quando che i'é tornadi da lu in denocion
parchè de meterse d'acordo no i avea intenzion,
i ghe à domandà co le rece base e 'l magon
se l'avea tanta presa de andar in pension.**

E tra pianti e comozion
l'a acetà la rielezion.
An discorso da incazà nero,
da far tremar al parlamento intiero:

“Vardé che al fae par colpa ostra,
parchè in sti ani no avé dat nisuna risposta!
E quel che ve dighe vardé de far,
senò ciape la Clio e scampe al mar”

**E senza an premier par al Paese
sion tornadi ancora ale larghe intese.
E par menar avanti la caretta,
chi meio de lu, de Enrico Letta?**

**Par slargar polito la so coalizion
l'a ciapà ministri da ogni canton.
Da Alfano alla Bonino
par darghe speranze al nipotino.**

No se pol dir che no 'l sie partì col bot
al primo dì davanti al palazzo an carbinier l' é quasi mort.
De corsa l'a proà a ingranar
e a giugno al se à inventà al decreto del far:
da Equitalia e le so variazion
a tuti i vantagi de la semplificazion.
Par le imprese e le fameie l'à sempre laorà
par sbasar le tase co la lege de stabilità.

**E dopo eserse stabiliti
l'à taià al fondo publico ai partiti.
Ma andando avanti l'a pers i toc
senza quei de Forza Italia l' é restà medo zot.
E come che te sti ani se son abituadi
al ghe a pensà al so partito a romperghe i piani.
E ala fin al pore Enricheto a Palazzo Chigi
al se a catà solche co quatro bagigi.**

Eh si... ala fin dopo finti silenzi
no lo a ciavà al Matteo Renzi??
Se vede che in Toscana ghe n'é na diferenza
tel conceto dela coerenza.

“No oi al posto de Enrico Letta” al disea,
e dapartut lo ripetea.
L'era partì a dir con convinzion
“mai al governo senza elezion”.

**Con Berlusconi l'a fat na roba epocale
a meterse d'acordo sula lege elettorale.
E l'era ciaro che co sta mosa
l'avea ispirazion de mover calcosa.
E pochi dì dopo co gran velocità
l' à imbastì su na squadra e l' à giurà.
L'é doven e pien de morbin
speron che almanco lu al dure an cin.**

Ma no te vede che a forza de sperar
son gneste vece bone solche a brusar.
No ne resta che dir su na orazion
parchè al Signor ghe dae na iluminazion.
A Renzi ghe dighe: bon laoro!
e chisà che al prosimo an no ghe sie n'altro pandoro
parchè sion stufi de cambiar
tuti sti governi e i so danar!

Ma ste tranquili!
De robe da dir ghe n'ho pien na zesta,
E alora assè che continue co kesta.

Finalmente - l'era ora - ala fin de l'altro an
i ha slargà al pont de Brihan
dopo ani de ciacole par far fan
i ha finalmente rinforzà i barbacan,

Avee mes par fin na bomba sot i sas
olee farghela sot al nas
inveze i la ha trovada prima del temp tele grave
tirada su e fata s-ciopar in riva al Piave

Vinti ani de pasion
proclami, promesse de pantalon,
e ala fin ten siè mesi tiradi
fat e finì al laoro tant da far pagadi

**par quasi che sione stati in miniera
che no tirone al fià par via dela pusiera
Che fadiga, che torgolon par fin de eser storni
le come pensar de far na vaka coi corni**

Ma tut qua, an gran casin par cosi poc
son straka, svoiada, ho la testa come an zoc
no ho pi fiducia, ho poca pasion, la burocrazia la ne fa fesse
i ne kava al sangue (altro che l'ABVS)

Son proprio ndate su le kane
me manca la "bira" de quando che ere a Pajane
I sogni, la voia de vardar avanti con speranza
son spompada da un milion de regole e dal mal de panza
ma sarale tute dovute?
parchè son drio rimeterghe la salute
par che i fae a posta par cenerme co la testa tel zampedon
me toca ciorme na **pastiglia** se no me gnen l'agitazion

**ma ormai la é colma la pignata
no ghen pose pi de tuta sta fritata
no l'è laoro, gente che va in falimento
e i morti suicidi i è già pì de zento.
bastaaaaa!!!!**

bastaaaaa!!!!

bastaaaaa!!!!

col sistema che mi fae e ti te desfa dove ndone?
ala fin pagon sempre noialtri mone.

Tasse in generale

E po davvero, co tute ste robe brute
mi me rovine la salute...

Par esempio l'é an pochi de mesi che no dorme de not
l'é pedo che a capodan coi so bot
me sveie ale doi, sudada come an pes
e zighe de continuo: iuc imu tares
iuc imu tares, IUC IMU TARES

oddio l'é partida. Ma tasi!

Orco can!... erelo ancoi da pagar la TASI??

ma no, no, atu capi che? Tànete, stà bona!
No te vede che co ste tase i ne cava anca la parola.
Anca mi ere sustada, e alora son ndata in posta
par zercar qualche risposta:
i a tacà a parlarme de scadenze e ravediment
ma no ere bona de capir gnent...
eh.. anca mi ghe ò proà ma me son rasegnada
i me a dit: "varda sul sito che l'é 'na monada!"...
E senza PC e conesion nisuna,
son tornada a Frate Indovino e a la so luna:
Par dicembre e par genao me la son cavada
e me son data qualche regola.. così.. inventada:
co la luna la cres... l'e ora de la tares;
co la luna la cala,
paga l'imu e po fa na gran bala;
co che la duga a scondicuc,
l' é ora della IUC;
e co la é picenina e ghe n'é solche an tai,
i zento e pasa euri del canone rai.
Ben, varda... mi de na roba son segura come la mort:
co no ò pì schei e par decider che pagar tire a sort...
co la luna la cres o co la se sbasa
co an nome o co n'altro, i ghe n'ol sempre masa

Bolete dell'acqua e altre amenità

A proposito: ve sarè acorti anca voi
che l'ultima boleta dell'acqua l'era fora par i troi!
ma OL DUN CAN DUN PORCO
pagone sempre noi par le facce dei politici di bronzo
anzi par an comportamento da emerito str..... zo?
ma come ali fat a no inacorderse de 80 milioni de debito
ma dove ereli, ma penseeli solche a tirar la fin del mese e incassar al credito?
Tant paga sempre qualchedun (come sion drìo veder)!!!

Ah! No ghe ne pi vergogna, la verità la é talmente sporca
che no i ha al coraio de dirtela vaka porca
e se la gnen fora dopo ani de magnaria
de segur no le colpa soa ma de me zia!!!!
Anzi: par lori va sempre “tutto benissimo”, se sa,
a conferma che pi stupido che te se, pi cariera che te fa!

Ma ades basta cativerie le meio che vae a confesarme dal pievan
che insieme ala penitenza al me strope al gargat così no fae bacàn
e a forza de dir su rosari chisà che al Signor al varde qua
par sistemar an poc quel che avon brusà

(Tra sè, sconsolata:) sù... masa bel e masa facile...

Ma na orazion la dison su i stess...

(farfugliano una preghiera)

Ben, ades che avon provà a pregar,
se pol anca provar a continuar.

Visita pastorale del Vescovo

Se no ve ho ancora rot le bale
andon col tema pastorale.

Par squasi tut l' autuno pasà
Bepi Vescovo l' é stat qua
e l' à finì squasi a Nadal
la so Visita Pastoral.

Eco allora chi che l' é stat
che a fortha de basar l' anel
la ghe à sbausà la man
e sporcada de smardel!

**Ma sù!! Son ancora tant comossa!
Me 'l son vist rivar 'na matina
a casa mea: son gnesta rossa
e po' bianca come 'na puina:
sua ecelentha a casa mea!
Erelo chi che se lo spetea?!**

**No l' é vera! Ere cussì contenta
de averlo là, che ghe ò dit:
“magnelo 'n cin de la me polenta
col polastro e 'n cin de schiz?”
E lu, sentha tant pensar
al me subito dit de sù
e tra le ciacole e 'l preparar,
l' é gnest subito medodì:
avon l' Angelus recità
e a magnar avon tacà.**

Ma te podea 'nca sbregarte 'n cin
e darghe calcossa de pi fin!”

**Ma che mo! L' à magnà cussì olentiera
che avon netà anca la caliera
e 'l se à gustà doi bicerot
del me meio vin merlot.
E par concluder la giornada
se sion fati anca 'na cantada.**

Manco mal che 'l se hà 'n cin stravià,
pore vescovo! I lo à ben stracà!
Tant i lo à fat girar intorno,
da tirarlo medo storno!
Prima a Sedego a cresemar
e po' a Roe Alte coi bocete;
gnanca 'l temp de tirar al fià,
che a Roe Base l'era spetà.
Quei de Brihan? I era belche 'n cin sustadi
e i se sentia trascuradi;
e allora cori subito anca là
e, par farse perdonar,
anca la Banda al va a trovar.

**E po' cori via a Longan,
parché anca là i fea bacan.
E po' a Landris e Prapavei,
su a Viliago e via a Pasa,
coi so afreschi cussì bei.**

E quanti incontri co le asociathion!
Al li scoltea con atenthion,
po' tuti quanti al ringrathiea,
con in medo ala ciacolada,
qualche benevola botonada.
E co i bocete? Al se catea benon,
al se fea ben scoltar
e po' co lori al se metea anca a dugar.

Ades thercon de no desmentegar
al so esempio e le raccomandathion:
tanta strada avon da far,
ma ne accompagna la so benedithion.

Quarantesimo Canal del Gat

E ades, par restar su le robe bele,
ghe ne quei che ha passà dale stale ale stele.

Satu cosa che l'è stat?
Al quarantesimo de Canal del Gat!

Te pensitu de quando che ndea su i nostri fioi?
Na settimana fora dai piè, che contenti che se era noi!

De ndar su a cener ben tuti i ani
no manca mai i nostri paesani,
tra Bruno, Ezio e tuti quanti
da quant che i laora sarìa da farli santi!

Lassù l'è passà ormai do generazion
tra an dugo, an scherzo e na canzon
e quant che i se ha godest: an sac!
De lamentele nisun ha mai fat bac!

E co l'aniversario apena pasà
na iornada de ritrovo i ha organizà.
(tutto previsto, anca la navetta
par quei pi pegri, par rivar in vetta)

In dosento e pì i se ha catà
che i sarìa stat tanti anca solche la metà.
La Mesa, al pranzo e tanti ricordi bei,
da gòderse par tuti ghe ne stat asèi.

E po i tosat i ha podest veder te le foto vece
so mare e so pare ciapadi par le rece
da qualche pore animatore desperà
parchè, doveni, qualcosa i avea combinà.

Par fortuna sto an la Parochia e l' Comune i ha contratà
e par i prosimi sie ani la malga i ha affittà;
speron che i tosat i pose continuar ancùra
a goderse i campeggi in medo a la natura.

Emergenza neve

**Ma cambion an sciant argomento!
Parerie che sto inverno finalmente al sie passà,
ma podone proprio dir che'l sie mai scominzià?
Va ben che al temp, al cul e ale femene no te ghe pol comandar,
ma proprio solo piova dovelo far?**

Se te sentise ades quei su par Cortina
I te la mandarie dò lori na bela slavina!
"Emergenza neve in tutto il Cadore"
ecco qua i titoli che ha fat tant scalpore!

Tre, quatro, zingue metri de neve l'è rivà
E, porco can, tuti in tera i me li ha trati i tabià!
Protezion civile, Alpini, volontari, tuti a laorar

E anca me ieia Nina i ghe ha rivà a salvar!

Pore vecia! A casa da sola no i ghe ha asà star
E la so fornèla la ha dovest abandonar!
I olea cargarla su te l'eli-ambulanza,
ma ela la ghe ha dita de no con tanta creanza!

Ela tranquila, no la se ha tant scomponest
La ha mes su le ciaspe e la ha portà in do an zest!
Inveze i turisti che i olea 'ndar a siar,
anca a quel sport i ha dovest rinunciar

Parchè la corente la è 'ndata via
E nisuni pi i li tirea in su co la segiovia!
Ma ades basta l'è ora de cambiar discorso,
senò qua gnen fora anca la storia del'orso!

Papa Francesco

**E allora ve contarò questa:
L'altra matina co ere al cesso a pisar
Ho senti al telefono che ha tacà a sonar.
Me ha gnest da pensar: sarà qualcun che ol far pubblicità,
e invece no! L'era proprio lu: so Santità!**

Ah papa Francesco l'è sempre soridente
E ghe pias proprio tant star in medo ala gente!
Internet, meil, tuitèr, feisbuc,
ogni mezzo l'è bon, va ben tut!

Anca i doveni che i è sempre difidenti
Sta olta i è restadi proprio contenti!
Quando che 'l predica al ghe met pasion
E anca al linguaggio se ha dimostrà na rivelazion!
A'l usa parole che le fa gner la pel de pita
E la gente, co i lo scolta, la resta sempre stupita!
Ma che'l sia argentino no l'è na bona motivazion
Par poder dir "cazzo", davanti a tuti, in television!

**Quanto al clero locale,
mi no so mea se l'è normale!
L'altro dì ho vist l'arciprete co pala e picon
E ghe ho domandà: falo che de quel buson?
Al me ha rispondest: l'ho fat par cenerte in piè,
no te vede che goba che te se?**

Legalizazion de la Marijuana

E ades speta: Atu senti de l'ultima trovada mericana?
ghe ha saltà in mente de legalizar la mariuana!

Eppur i avea già le pistole par spedirse sot tèra,
no la ghe servia proprio la droga leièra!

Vist che tant no la crea dipendenza,
al mercà i te asa anca comprar la semenza.
Così te pol farte su la to bela piantagion,
e nisuni te impedis de diventar sempre pi cojon!

E po i dis che così i combatte la criminalità,
come se no i avesse pensà prima a quant che i avarie guadagnà!
No olarie mai che la diventese an ben de prima necessità
Così i cojoi i aumenta ancora anca de qua!

Immoralità diffusa

Ma... Atu vist tel novo vocabolario??
al ho sfoià vardando al dizionario
sparide parole come, "correttezza, moralità"
manca anca "intelligenza e onestà"

le al segno dei ani
che tutti i ghe dighe ai altri de eser sani
ma dopo noi par primi gran marpioni
son veramente dei gran furbacchioni

Piandon al mort
par ciavar al vivo
ormai le normale ciorse par le bale
quel che na olta te fea gner ros dala vergogna
ades al te asa la schena drete e gnanca na rognà

(facendo finta di parlare tra sè)
Quasi quasi utu che imbroione cara me bela
così se meton qualcosa in scarsela
tant oramai utu che i me fae cossa?
tra an s-ciant i ne brusa e ndon tela fossa

ma no le meio che rigone drete
e che pensone al ben e che stone cete
oi che entro de noi ghe sie an cin de pace
e anca entro de voi prima de impizarne te la brace.

Concludendo

CONCLUSO AL DISCORSO,
SCUSENE STO SFOGO
CIAPON SU LA VECIA
E PETONGHE FOGO !!!!

